



## INATSISARTUNI

Partii Inuit  
Randi Broberg

UPA 2014/175-1  
3.6.2014

**PILLUGU: Apeqquteqaat aallaavigalugu teknologimut nutaamut misileraavimmik assersuutigalugu qillerinernut, avatangiisinik eqqarsaatiginninnermut uuliakoortoqarsimatillugulu saliinernut atatillugu ilinniarfinnut, aatsitassarsiornermi ingerlatseqatigiiffinnut kattuffinnullu allanut ilisimatusarnermi, misileraanermi takussutissiornermilu neqeroorfiusartussamik pilersitsinissaq pillugu oqallisissiatut siunnersuut.**

(Inatsisartunut ilaasortaq Naaja H. Nathanielsen, Inuit Ataqtigiit)

Partii Inuit siunnersuummik paasinninnerput malillugu, ujartorneqartoq tassaavoq ilisimatuussutsikkut ilisimasat atortorissaarutitigullu periarfissat tunngavigalugit, inerisaavimmik saqqummersitsivimmillu pilersitsisoqarnissaa.

Naalackersuisut akissuteqaataat eqikkarlugu oqariartuutigineqarpoq, ullumikkut pisuussutiniq uumaatsunik atuinnermut atasumik ilisimatusarnikkut atortorissaarutitigullu inerisaanerit, nunani assigiinngitsuni ingerlareersut. Taamalu Nunatsinni ilisimasaqariartorneq ilutigalugu, akisussaaffinnik suliniutinillu tigusiartorneq ingerlatsinerlu annertusiartortut.

Taamalu siunnersuut pillugu Naalackersuisuniit ilalernartinneqanngitsoq.

Tassani Partii Inuit Naalackersuisut oqariartuutaat paasisinnaavagut; tassa Avatangiisit Nukissiuuteqarnerlu pillugit Qitiusumik DK'imi ingerlatsivik (DCE) Pinngortitaleriviullu sulianik ingerlatsineri, minnerunngitsumillu Nunatsinni Nunap qanoq ittuussusaanik ilisimasanik Eqeterivik (GeoSurvey Greenland) ingerlareersutut sapanginnaveersaarneqarnissaat ineriartortinneqarnissaallu.

Partii Inuit immikkut taarusutagut:

- 1) Siunnersuut piviusunngortissinnaajumallugu, aallaqqaammut annikinngitsunik aningaasaliissuteqarnissaq, ukiukkaartumillu ingerlatsinermut aningaasaliissutaasussat eqqarsaatigalugit – aningaasanik naleqarpoq. Aningaasaqarnitsinnilu atugassarititaasut eqqarsaatigalugit, qanoq atorluaanerpaamik aaqqiisoqarsinnaanera nalilersussallugu pisariaqartipparput.

Partii Inuit pissusissamissoortinngilarputtaaq, aammaloortumik tikisitat isumalluutigalugit ingerlatsineq nangeqqinneqaannassappat.

- 2) Siunnersuut Partii Inuit ugguuna soqutiginarput, pingaartumik *sulisussaqaarnikkut* qulakkeerinnittumik pilersaaruteqarnikkut, ukiuni aggersuni anguniagassaqqittutut.



## INATSISARTUNI

Alloriarnertut siullertut orniginartillutigu takorloorparput suleqatigiissitaliortoqarsinnaasoq. Suleqatigiissitap suliasarissallugu ikummatissarsiornikkut / aatsitassarsiornikkut ilisimasatigut atortorissaaruteqarnikkullu killiffinnik erseqqissaanissaq.

Ilanngullugu qalluinermi periutsit pitsaanerpaat suunerinik qulaajaaneq avaqunneqarsinnaanani.

### 3) Suleqatigiissitatut takorluukkatta pingaaruteqarnera Partii Inuit qularutigingilarput.

Soorlu siusinnerusukkut oqariartuutigisaripput, aaliangiiniarnerni suniluunniit paasissutit toqqammavigineqartut sapinngisamik illuatungiinnarsiortuunnginnissaat pingaartikkatsigu.

Naalackersuisut akissuteqaatiminni siullermik oqariartuutigaat, pisuussutinik uumaatsunik atuinermi avatangiisit eriagineqarnissaat sillimanikkullu illersorneqarnissaat pillugit, aatsitassarsiorniartunut piumasaqaatit qaffasissumik inissisimasuusut.

Aappaatigullu aamma akissutikkut erserpoq, pisuussutinik uumaatsunik atuiniarlutik qinnuteqartut pisussaasut, Nunatsinni Naalackersuisut ilisimasatigut pitsaanerpaamik tunngaveqarlutik aaliangiinissaannut qulakkeerinnissasut.

Allatut oqaatigalugu illuinnaasiortumik, tassalu qalluinissamik qinnuteqartut namminneq paasissutissiinerat kisiat tunngavigalugu, Naalackersuinikkut aaliangiisarnerit ingerlanneqarput.

Tamanna Partii Inuit pissusissamisoortinnatigu akuersaarsinnaanagulu oqaatigereerparput aammalu oqaatigeqqittariaqarlutigu. Tassuunakkut aamma oqartussaaqataansinnik mangiaanertut taaneqartariaqarmat.

Suleqatigiissitap ilisimatusarnikkut atortorissaaruteqarnikkullu killiffiit, minnerunngitsumillu periutsit pitsaanerpaat suunerinik qulaajaanermigut, innuttaasut tusarniarneqarnerini oqartussaaqataatinneqarnerinilu, minnerunngitsumillu Naalackersuinikkut aaliangerniarnermi - suleqatigiissitap ilisimasatigut pingaarutilimmik tunngavisseeqataasinnaasoq, Partii Inuit massakkorpiaq pingaarnertut nalilerparput.

Partii Inuit taama oqaaseqarluta, oqallisissiamut qujavugut.